

養
一
齋
文
集

養一齋文集卷第十七

武進李兆洛

祭文

常州府忠義祠祝文二首

祠祀文信國配以姚陳王劉諸公皆宋德祐守
上殉難者也道光十二年新營享堂告成祭而
祝之

額額龍城江吭浙屏一丁隋燹再厄元兵懿惟丞相隻
手拄天亦越龍圖授命喪元寶章仁勇承宣合志統制

倡義秘閣贊計五牧燿尹虞橋隕麻包阮方莫國殤同
嗟壯我城池歆我俎豆五百年來薦馨罔後骨蕭自昔
懷梯載新民所弗諉浩氣彌綸熊熊靈旂建威銷萌式
訓于忠保我後生

祠之前堂祀自漢以來郡人之死王事者以堂
圯故重修告成會奉

命增祀明末死義諸人因并祝焉

延陵之虛斗光燭焉文章氣節自古而然曰虞曰彭惟
漢之豪在晉則周在齊有蕭唐蔣宋胡皆標特操其在

勝國士氣彌厲不恤吹堯自甘塗地

帝曰予嘉報汝茲馨立我頑懦爲

皇干城觥觥諸靈有位無位事或未彰史或佚載咸秩
無文登之一堂俚此神宮侑以椒漿來瞻拜者自命何
等志士仁人聞香猛省

惜字拾遺會祀倉聖祝文

維聖天縱書契肇興遂闢洪荒以覺黎蒸天樞大炳人
紀攸憑片言萬禩黜墨百朋寶護宜至息棄亟懲宏願
式啟良軌爰承搜幽索隱什襲緘滕假六丁力挾元精

昇煨燼何嫌傳火斯燈江海靈納雲霄爽騰文光還燭
鳳翼龍膺作者謂聖祀典有恒洋洋在上馨薦豆登

祭周石芳先生文

江雲暮黯緒風春悲茫茫天道翳翳靈旗嗚呼哀哉繫
惟夫子道資先覺懷忠履信懿文碩學月中名顯日下
聲隆西清東觀望實攸崇納牖惟忱是膺

簡在宣勞中外日嚴載采用惟所適體罔不該持之翼
翼出之恢恢玉不病礪金不辭鍊折而不撓光乃大絢
熙熙躬化穆穆旁施巖巖表望湛湛流慈所存則神名

詮豈旣敢質言者身之所被歲陽元默節泣江干思樂
在泮德音孔歡設以繩墨陳以規矩照曠若鏡操清喻
水匡之翼之陶而埴之旣開旣塞乃潤色之士蓋幸覲
塾勵蓄畚音端正始範我先模幸有講舍在黌之左鹿
洞鶯湖厥風未墮薦經風雨鍵剝薨傾博士倚席絃歌
輟聲乃飭司存載除載葺權直勸輸自貸以率鞠草斯
薙覺楹斯新居肆成事矜佩莘莘日授稟餼瞻其貧者
計口量出可食蓋寡江壩積淤彌望廣斥民耕田之無
租有籍命移其籍以籍學官歲取十千穀我儒冠年丁

水毀天作淫雨嗟此澤國其魚安處蒿目而咨伊恤遺
黎金粟何藉董勸疇司俾爾綏慰明哲之長俾爾坐鎮
勤勞之將曰穀不繼糴之鄰庾曰鋤不繼支之大府侯
貫侯施侯資侯廉侯規侯爲無陂無靡吏肅于政惠孚
于實戶鮮流亡野無菜色公忠體國仁愛體天豈曰驩
虞性術行焉甄經綜藝禮磨義砥不稂不莠以生我士
澹災醜沈起踣援淪不吟不呻以生我民士民之慶涵
蒙祉福歲計有餘羽歡尸祝胡不萬年胡不百年閱焉
不憖如何昊天那隕幹楨人離父母誰不摧心况我朋

舊易逝者時不沒者思神靈返矣紀祀在茲尙饗

祭左夫人文

猗與夫人德孔禕只葱牙玼珥中聲詩只伉儷名碩膺
天禧只山河借老象服宜只如何不弔奄乖離只君子
悼心陳素詞只桑德攄懷表旒旗只展時懿鑠亡女師
只百姻庶姬涕漣洏只攀繫羞蘋惟告哀只夫人篤祐
澤世載只本支晄靄耀東海只窈心窈容芬蘅茝只敦
嫺四教行靡悔只輦續衿纓髧垂髧只有齋奠牖議脯
醢只期愆歸妹粵有待只蹶父相攸錫祚在只乃嬪于

左百兩逮只顧茲盈門翬翟璫只君子光光國盡臣只
瞻言百里紆長紳只在公忘私貴能貧只元妃悼喪遺
育詵只惟溫且惠體慈仁只朝榛暮梅鳴鳩均只漫漫
葛藟膠木緡只則百斯慶克昌蕃只宜家宜室躬彌綸
只靡親靡䟽飲以醇只君子綏祿殿邦國只

天子是毗式百辟只南浮瀛壖北湘澤只容幃四驪共
登陟只雍容雜佩勤內職只君子嚴翼進陳力只引年
懸車介如石只逸老林皋飾巾幘只璇閨瑤祀樂無斁
只鴛鴦于飛宜遐福只皇天棐忱善厥祥只胡然冥昧

而莫禴只星未五終俄隕芒只像設在室杵懸裳只生
安其榮沒不忘只雲車委裝返帝鄉只悲彼下女捐纓
纓只蕙肴桂酒肆椒漿只繡帷飄飄聽珎璜只靈兮若
來歆苾香只

哀誄

趙收菴先生誄辭

維道光三年歲在癸未二月二十日庚申故內閣中書
協辦侍讀山東青州府海防同知歷署登州兗州知府
收菴趙先生卒於里第國喪雋老人亡準維薦紳悲哀

承學悼歎爲位相弔忉怛增慕嗚呼哀哉先生導世德
之清淑毓川嶽之寶靈學則甄綜百氏仕則毓綴羣品
進則當位陳力退則垂教被世文而不華實而不樸動
而不躁靜而不滯邦之子弟時之彥英莫不泳其涯涘
由其軌範鄙倍以化驕頑自消伊人匪存來芳孰與夫
行經故國猶以喬木見欽目想存形遂使虎賁增重段
干在而邦君式閭彥方存而鄉黨知義慕有道者角巾
皆藝祝庚楚者畏壘用穰春言桑梓人物凋瘵屈指碩
果惟先生存復不慙遺吾將安放老成徂謝風流渺然

降固之痛豈惟私戚嗚呼哀哉潁川太守門生以之樹
碑文範先生儒林於焉考謚敢述景行著之表旗爰爲
誄曰

璇澄淵耀桂葆巖丹酌潤何遠留聲則難亶亶嘉時飄
忽不還哲人之萎其誰不歎邈矣先生顯休世祚雲連
風接天祿來處載誕淑靈稟茲懿度文以典術守以純
固水盈而流德交而形淪心衆妙蔚藻于榮學立道通
有渙其聲矯翼雲霄遊集上京爰從槐市奏賦長楊標
倫軼伍入侍明光陟降太微忠亮孔彰惟穆惟宣令聞

載揚乃位州端光益上府再綰郡符千室謠舞清風所
漸慶輝斯佇啟俗造規履方沈矩進匪乘流退或遇坻
不牽於位奚于於時盤桓育德宏道是期講誨循循還
邇不遺歛纏未疾偏體湯枯天以貞疾葆公道腴躋躋
鑑井桑戶踟躕偉哉造物爲此拘拘靜言樂幽閑居外
物閉戶隱几解散散帙神用豈異嘯歌無斂飾巾待期
奚充奚詘苑樹秋涼庭花春粲舊雨遠來停雲欲散招
集親賓扶攜童冠門生與筇通子侍案烹必選甘酌必
命醇于旅于語德音振振故老前言邦賢軼聞瞻儀成

憲記史爲惇載仰容顏載聞謦笑棲棲其和惜惜以告
莫不怡懌思心則效飢者忘餐飲者忘酬聿歲發春拜
公牀前公笑且語昨夢惘然若有神告示以其年積算
八十餘策四焉小子稱爵爲先生壽神理固然天惟純
佑矧伊後生方仰露覆羣心所靳遐不黃耇斯言如瞬
月僅浹辰崦嵫荒黃赴者在門攀慕無及動於心魂道
長運促命也奚云嗚呼哀哉先生之存羣流翕萃先生
之歿吟思未艾士沾膏馥人蒙息沫道韻淳明靈襟盎
粹遺書盈篋竝誦流之遺言盈耳金石伴之嗟茲音容

云胡不留典型有作戶庭已悠嗚呼哀哉

青州府同知趙公沈宜人哀讚

宜人州吏目焜之母青州府同知趙公之繼配也實惟
吳興沈氏之季女字曰竹考忻州知州爲政宜民配食
於社宜人幼承趨庭孝乎惟孝窈窕德象有齋淑問時
青州再失伉儷請繼室焉年二十四爰初來嬪抑抑言
容媿媿矩範出人無忒家室具宜前宜人金誕四女士
叔季尙待年宜人體騶虞之篤仁蹈鴈鳩之均一顧復
允周親若毛襄婉孌戀影情逾保嬰逮育子焜檢誨是

展惟時青州參直中書擣家京室宜人奉幼小以從穉
屋而居不求爽塏青州景行邁世閎文宗時纓綬之徒
影附響臻于于而集酒漿筐篚靡不躬焉暨遷責州權
登究二府太守官舍閭如同於史雲肸飾嚴甚有逾柳
惠青州以持服去官因於屢空有無羸沒一以埤益青
州道德之間卓著遐邇聞風爭請化誘後進遂西行主
關中講席下車浹辰嬰纏未疾荏苒三載焜始扶持以
還而鑒影蹙躡動止仰人宜人夙夜調護彌成拮据體
勞能苦不樂假借病者以豫若忘其瘥道光三年青州

公薨宜人直誠罄信式禮莫愆益諄勛焜立德修行無忝前恭焜有幹力邑治渠道能佐成之實書庸焉

朝有錄事之褒焜念宜人且衰欲留不往宜人曰吾且未衰策仕進取汝之事也失此則後時勉加餐食敦促遄行遂於其冬注籍天官得叙班位星駕言旋思娛色養三月二十五日宜人有疾二十九日薨於里第越三日而焜始抵舍殮含之事闕焉不與號呼閔天不獲赦宥仰惟二母之行皆有先君綴錄顧念孤嫠孰究先軌敢仿永姜遺式作讚刊石惟以告哀詞曰

天乎閔下民欲斯從嗚呼予率降此鞠凶噫我哲母天
畀令恭汙泮密康副翬肅雍晏溫載德端操有蹤行守
內則偉爲女宗頊頊小子比于頤忝昭示紉類範之儀
容畢世勤瘁老猶尸養一命胡榮神奪智蒙蹇違左右
景命怱怱遽焉推奪不少延洪哀籲莫聞齟裂交胸何
皇天之不純命兮丁咎罰之我獨遯歡離其顛乖兮念
進退之維谷思解帶於汝墳乃孔邇之不復恨搯臂之
莫驚嗟白日兮何速痛黃墟之無間雖有躬而焉贖目
怊怊而質亂魂營營而蹙愿願穹顙之鑒茲亮水土之

不黷懿令德之延融惟終譽之有俶永抱結以痛瘖緬
儀型而易覲

蕭母吳太宜人誄

惟道光三年歲在癸未二月二十四日甲子

誥封宜人我江陰縣知縣蕭府君壽母吳太宜人薨於
江陰官廨邦失慈北世實禮宗用悼喪我神君大棄我
民庶嗚呼哀哉宜人毓世胄之淳懿稟柔祇之淑靈早
嫻四教克廸德象作配君子率禮無違閑家虔恭奉姑
篤孝崎嶇儉約之中儲培顯融之本鴈鳩之仁興於七

子麟定之美鍾於府君服官

王家典城百里換綬者再遷治者三瓜瓞既其綿綿螽斯方其蟄蟄葢珎璜琚瑪褱衣綸翟以母儀一邦者垂三十年子孫曾元朝寢侍膳以承華一堂者幾六十輩享黃耆之遐紀與福祿乎始終窮生人之寵光獲造物之豐報是用右我府君施及我邦人昊天不吊奄離此殃痛心絕望忉怛永慕衰經庭位申飭喪紀遷窆有期祭御部引路人咨嗟觀者歎泣嗚呼哀哉昔東海賢姬孟班勸書濟北夫人中郎作誄敢緣斯義乃申詞曰

於穆宜人僮僮祁祁衆母之母女師之師實稟純固篤
此翼貽大雲旣散空瞻合儀猗惟洪源蒼姬是胄天祚
至德奕世冕綬載誕賢明德音孔茂明詩習禮夙成自
幼來嬪東海惟肅惟雝畢力中饋幽閒有容組紉罔缺
邊豆斯供孝乎惟孝以御家邦其孝伊何威姑老憊宛
轉衾簟萬端攝衛以精喻神有感先意終晨致欽積歲
忘瘁莘莘哲嗣以駮以麟受茲義方軌度先遵處爲家
寶出卽時珍錫類之祚於我府君烝哉府君智周於務
文終世家法義惟古廉能自將含竒宰府計資功次隨

標外補初要黃綬幹 孜孜釐狀清省方圖可施遂驅
薄笨專城而居庇我陽星紀於茲甘棠垂恩諒哉儀
志綏擾以靜不嚴而治仁風先翔蒲鞭曷試天悅其和
人銜其惠番番壽母板輿爰臻載笑載言施教申申符
彩流映子孫如雲五世之昌親覩以身內朝副祿蠶郊
翟茀珮玉璫琚神明所越兒嬉白頭孫弄華髮福受王
母人瞻古佛毫而益戒尊而益欽履豐彌約處樂無淫
舍力是懼在勤有箴養以之福天命宜謐俾爾多益百
齡瞬在如何昊天而不斯待歸神大暮攀號莫逮樂樂

孝子慘慘心痾嗚呼哀哉黼黻周張輶車設飾驂駢悲
鳴士庶太息往來者運逾久惟德彭殤詎齊哀榮之極
登靈在天遺音播徽光我管彤億載芳蕤神畱此邦永
庇惠輝素旗舒藻惟以詠思嗚呼哀哉

弁江劉君挽歌詞

嘉慶四年五月予以試事赴江陰識劉君弁江又兩月
而弁江卒弁江農家子生而穎秀好讀書十九歲補第
子員讀益勵夏坐北窗讀中寒遂病竟死其死也沾沾
譔語呼其師若友論文字不輟口數日弁江氣清而行

橫口訥訥若吃事父母至孝謹其攻苦奮發亦欲博科
第爲父母榮也轉以是不獲終其孝養是命也夫并江
死其師若友皆哭之極哀將撰次其行事使後世有述
韓昌黎哀歐陽詹雖未得位其名聲聞于人其行誼信
于朋友詹與其父母皆可以無憾今以屬吾友祝子常
爲之傳并江其亦可以無憾矣子相見日淺不獲一赴
弔於其塋也爲挽歌以貽子常使輟而送之其詞曰
日晚晚兮年冉冉兮何情之長兮而命之短兮魂兮歸
來兮匪君之哀兮而吾黨之悲兮

養一齋文集卷第十七

養一齋文集卷第十八

武進李兆洛

贊頌

薛方山先生祖孫三代像贊

道繼闢閩澤畱桑梓文孫軒軒克濟其美誦芬三世百
代仰止

瞿忠宣公像贊

身致家國命懸蒼穹扶危持顛蹇蹇匪躬片土五年予
幸萬艱胡不我延爲之者天公名則完

爾定莊公像贊

在三之義貴賤奚判政雖不及亦踐其難志在扶日危
如一線成則夏靡敗則周頑子命可授親心則歡誅而
旌之至教天寬

戚中書伯屏畫像贊

大事去矣孤城彈丸責非守土心惟戴天浩氣所孚百
日同之一輓一杆兒女鬚眉國燼無然身灰畱丹蕭蕭
墓門赤日晝寒

康蘭臯先生像贊

於廓靈襟浩浩其天所受也全所守也專神運道表用
苞幾先周旋溫室夙夜密勿介而能和通以有節

帝用耆之四方爰發度括穆穆智斥恢恢世藹令聞敦其
崇魄治去鈎鉅力維傾頽揚旌旼旼衰屏起舞移節嶺嶠
氣懾妖蠱中更憂虞作鎮南楚綱厥駮駮振其叢脞綏
靖嘉師盡其在我誰歎褊心云不我可奉身而退悠然
有餘曠蕩羲宇從容老夫道有隱顯德無瑕瑜太行之
陽子則萬阜施而不德蓄以益厚君子有穀永啟惟後
陳雲乃罷讀圖贊

罷讀非罷學也今之所謂讀者申佔畢勤記問務采色以策科第而已其罷之也亦且若夫學則自一身之出入動靜放而至於家國天下無時焉可以離而務讀者未必知也蓋亦不暇罷讀其知務矣乎雲乃先生謁選出都而爲是圖若以寄其棄舉業之慨云耳夫棄舉業而求實學何慨之有先生昨假令常熟民歌詠之今蒞江陰未逾月也而信孚于民有公事據案聽之未嘗失理稍暇卽伏几治條教諄諄懇懇逮於古名臣先生之學方日進矣則罷讀云者罷其爲身心之累者也夫一

第之爲儒生累也久矣慨然爲之讚曰

古人志學以志道庸言庸行是爲寶今人讀書以爲學
蒐奇銜異若不足此心一放不可收文滅其質尤堪憂
所養所用兩相貿大者侗俚小紛糅季路有言何必讀
正爲當今示正鵠夫子亦復心然之特斥以佞嗤其欺
先生毅然棄幼志纂組雕文甯不嗜誓將奉身歸聖賢
設誠致行志力堅存心利物必有濟見宰官身特身試
暫屈虛遠救倒懸急先務者誠宜然他日仕優重展讀
恍然六藝皆忠告

吟釵卷頌

并序

兆洛之友周伯恬屢爲予言雨生湯君心嚮往之已而
與兆洛善者無不爲言雨生其後遊廣東得交雨生所
交之友又徧見雨生所爲詩畫益傾倒而竟未得一奉
顏面然心契者數十年矣楊君蘅塘雨生中表也持此
屬題蓋雨生尊先太宜人篇詠所僅存而雨生以寄其
無窮之思者也鳳山公以身殉城贈武德尉以身殉父
覆巢之下幾無完卵獨賴太宜人誠貫金石義揭日星
克翼二子濟於艱難宜雨生之嗣服孝思錫類保世矣

敬系頌言陋不足述聊志景仰且以諭于甬生致懷溯之私焉

懿矣女師德動人天風雷弗迷霜雪弗鐫千鈞一髮以延以完流徽播芳一話一言可紀彤史可貞珉璫況于篇章被管宣絃良玉可折不可奪堅聿有虹彩見於山川圖儀綢直像德淵蛸端策莊誦神靈憑焉口沫手胝不敝不湮永世克孝增虔後賢

常熟朱席君遺照頌

君子有穀裕後維嘉德修於身以型厥家釐爾女士中

道而鑿欽帥有成葆若靈芽孫曾繩繩衍瓌綿瓜積善
之慶蓋未有涯遺容穆穆天半朱霞球圖寶之永念咳
華

銘

辨志書塾銘

惟士尙志所志者道聖賢在座天地在抱萬化非多一
經非少存存萌萌良貴是保志有不立辨之宜早玩細
遺遠求安求飽歧能亡羊貪乃喪寶載銘爾室中以自
考

繆文貞公被逮時家書手稟道光四年太歲在甲申九月之杪謹裝治而銘其檢

斯世何世耶斯事何事耶而斯人適丁之耶其心日星也其氣風霆也其文則品物之露生其書則雲烟之蘊靈也庶頑立懦百世之師猶有鬼神呵護在茲

天球銘

道光十有三年年名昭陽大荒落月名畢辜日雄在丁日雌在卯時加申日月會于析木之次
粵十有二日時加寅日南至躔箕一度二分半

大月在奎七歲在奎六填在軫一太白辰星皆
在心三熒惑在尾一初昏東壁中江陰六嚴考
度徐泰製器宜興路立叅刻字

道一而已惟變所適開物成務往來闔闢消息盈虛觀
象于天反復其道君子乾乾

日晷銘

日東景朝辨色斯朝惟寅宁恪茂卯賢翹羔裘有耀進
思載勞清明在躬令德孔昭

面東表

日西景夕序業其贖申束益虔留酉無郟視蔭而惕莫

氣所亙乾乾若鴈至誠不息

面西表

矩之視方川之視平砥此片石以爲玉衡直則中繩圓則中規置臬識景協乎璇機八表同流四時得節我守其式維皇之極聖人體逝君子惜陰位三才中天地之心

面南地平表

淮南舊壘斃銘

宋史連庶傳庶爲壽春令淮南王舊壘在山間會大水州守議取其斃爲城庶曰弓矢舞衣百世藏於王府非爲必可用亦以古之物傳于今

尚有典型也壘因是得存予求壘處城北五株
山下士人相傳爲古淮南王廟有壘跡存焉壘
之毀不知何時殘甃滿地率破碎無文字其質
堅潤如玉非後世陶旃所及昔人珍之後人棄
之不亦慙乎爲檢取其有隱起繪畫稍完整者
凡數十枚識之曰淮南王舊壘甃以貽諸好事
者嘉慶癸酉春分

是涉浩劫危若一葉旣剔旣剝以躋端歛

研銘五十一首

予于鳳臺得佳士焉曰蕭景雲氣清而醇行已
斷斷予輯邑志凡山水古蹟皆其所身探而口
述者購此輒爲研乞予爲之銘

輒也誰奇之而與結文字之知輒乎傳乎孰使然乎

琢漢元康殘輒貽于丕

石耕非計錫之土田湛露流膏荷寵自天元元之望康
康之治宏我兩京以研諸慮

貽書巢先生

晉殘輒紀泰始文小篆致茂美千五百年見于此濯之

磨之亦其理形疎質賤不自鄙願登君堂侍君几侍君
几娛君心君心惜惜石與金數斗墨汁亦何貴貴與古
昔相追尋武城之絃單父琴至今傾耳畱餘音尺璧亮
非寶康瓠那復道幸附遺文効我思泰甯終始長相保
偶得古甌爲硯以其宜墨也同人各琢一枚置
案頭視端歛殆蔑如矣此元康甌之半衛根所
用擇言于余諗之曰

奚土奚石惟用之適孰陋孰文惟質之敦是於學爲樸
於行爲篤于守爲獨而君子所不外求而自足者也

銘子石研 元康殘甌得于黑石潭龍神廟漁
人夜網魚潭側常見員月印潭以爲驅龍珠也
以其文也干文最宜其所憑依其所自爲

銘書紳明府硯

茶之誦與以駝榮釵鏤被黼黻若元德位康厥是寶藝
訓惟土物

製硯貽伯恬係以銘

求無所可用久矣乃今得之爲予大用

貽冠山琴硯銘研銘

孰陶甄是夫子莞爾

鄭生懷齋以有氏甄貽予予既得元康殘甄因
製硯報之

質不癯文不脞閱二千載而不墮比德焉可

曾大亦如購一殘文曰吉利字畫古勁亦魏晉
物既琢研乞予名

以此鵲鷺儕之鳳味吉無不利大有天祐

耕者獲古軍持因以元康城殘甄寫其形貽莢

舫

止則長城屹防行則壺漿望幟三寸毛錐亦策勲露布
不須磨盾鼻

元康甄研銘爲益堂明府

是連城寶策藝苑勛縝以流潤樸而致文醴醴墨華郁
郁紫雲永錫難老娛我神君

得漢元康殘甄製瓜硯貽贊卿

異此沙礫耀乎奎光我占包瓜君子會章上美維德民
樂曰康式追弱翁愼事自臧

六安關元輝藏節鉞硯銘

磚之鈍斧之利保其質善其器藏則全用斯貴

亦亭咸安磚

厥質美陶所揉也著文焉裁斯遊也文與質俱則千載
不渝其揉諸游諸可以人而不如

貽惺盒

昔也金城今也石耕弓矢舞衣尙有典型

貽亶木

是雖土苴无注者巧俯仰卽是莫名其實

貽春圃

人棄如土不毀其方我友如石不泯其光是其閱世久
矣乃闢然而日章

貽翥江一

此一坏土化爲神奇盪胸雲海騰英墨池

貽孫泰交

磚則殘硯則完疇其保之子子孫孫

貽師誠研

田方寸水一滴道何在在瓦礫

貽新吾硯

硯陰作維摩象

面之卽壁磨之卽鐵一以爲泥滓一以爲華澤此夫不立文字不離文字而游行自在者耶

貽修罔

匪璧之懷而土之寶學古有獲其風肆好

貽翥江

可與觀古可與論道則輒也而珍于金而況於人乎

爲文虎銘相羊硯

土之怪耶石之叱耶以麗斯澤資于光耶視爾所藏毋亡爾羊

以巨硯貽雲乃系之以銘

騰之爲雲注之則雨流之如海容之卽宇引之中繩絜之合矩燥濕因時用舍有處信鴻筆之都居宜端人之所取

以和得宋人臺硯豐肌縹理佳材也足已缺齧砥而平之屬予銘

端而栗醇以懌切之磋彌其缺以規蔡蘇黃米之手澤
鐘硯銘

起鳳騰龍待其春容瓦金黃鐘曷維其同

墨城硯銘

建此墨城康爾笥櫝殘文斷字磚礫珠玉陶甄性靈圃
囿舊穴珍之惜之藏用之勗

嘉量研銘

非金非石亦璞亦渾程此嘉量爲文藝準縣之國門無
有增損

六星研銘

東壁主土爲書府北斗戴匡爲文昌得於斗墟之壁是
分叢桂之香

甄研銘

十三首

在泥塗辱安辭厠翰林幸榮施以瓦注奚巧爲遇先生
知所歸昭文氏忘成虧保千齡長如斯

一卷書終身可矣一尺土逢年可矣君子不玉不石不
墨不白不博醜謂之道

其文若隱若見其理若密若漫其德若全若半材與不
材乎無用之用乎以其類已也故重之也

物無小久則珍懷殘缺思古人

敦琢其章惟土物愛厥心臧

精氣入而粗穢除

伊支離時奚施癡惟宜誰之貽

放倒壁子打開布袋請雲山大山下語

太上若辱若不足元之白之從所欲甄之專專兮完璞
研之剗剗兮抱獨

泰鴻片石遠無紀始命烏曹僦倉史甄兮專專葆厥美
研諸侯慮成壘壘

永世有道在不隳和調塵垢鑄今古塼之專專龔水土
研研施施此石輔

阿有卷兮矢好音閣雲醺雨膏均斟孰專專兮匪自今
研之不磷聖所任

元箸旣得腐亦神康瓠自寶全吾真孰專專兮取旣陳
研道園兮苟日新

端石研銘 七首

疎質密理勁而柔姿方圓平直無施不宜此真端人可
久久相依惜乎遇君之遲

如孟如盤散諸花香如潭如淵爲蛟龍藏播芳馥于四
時戰元黃之干塲

但有寸土逢年自古行與子還無憂石戶

方以完如其端可以觀

端而快永廸之不在大

飽毫渺盛文藻國無小

方中矩直中繩平中衡大以正安無傾合此五德端以
之名

爲磚印造篋聊銘之

二首

含章可貞六二之動泥塗非辱賜緋非寵斯文墜地君
子是恐胙此者誰時時持弄

金之玉之纍纍土苴道在瓦礫牢歟石歟昔維烏曹今則近朱一坏斗大竊璽何虞

磚硯匣銘

墨之守土之寶

帽筒銘

八首

頭容之直骨所植莊誠勁正思比德崔巍切雲惟女克冠圓象天知天時寒暑一節能者誰雖在閒處宜得師望之英英卽之亭亭庶幾此君宜爾會星浮雲旁達不隼不傾蓋言稱也地平天成

上美曰元龍扛鳳駕如尊有檠如圭有藉赫兮喧兮無
冬無夏玉而冠焉沐猴奚詫

頭頸必中爾無象恭

有斐君子會弁如星如琢如磨綠竹菁菁

居其所元首康哉

觀我生有孚容若

筆筒銘 七首

玉笋排來渭川千畝心花發處金谷滿園

振宏寬通鴻筆所宗

虎豹有文在山而隱蛟龍得雨自池而興

善藏器以待試有攸往無不利

玉笋班之總領管城子之鄰居

小藏烟雲大函元氣東南之美盡于是矣

受言藥之其直如矢寬兮綽兮有斐君子

香筒銘 二首

以清虛藏爲衆香谷偶薰一炷可以醫俗

靜以含精如灰宿火動也具理如香出烟韜而植之以

束身也默而存之以修心焉

筮筒銘

與天地準易簡理得以此不易成其變易引而申之遂
知來物其靜也專退藏於密

墨磨銘

天其運地其處日月爭其所執推行執勸成屈伸而利
生世其磨乎墨其我乎磨不自轉疇其轉諸墨其殖乎
我其臚乎

製天球列中星以辨時合渾儀刻漏而一之銘貽
雲乃

大道自然入於機自然無心機者有爲以有爲法肖
無爲體乃忘乎人契乎天矣天之自然亦其機然機自
道出天載斯全

筆匣銘爲生甫

我有文木厥理縹然廓其有容衛我文翰玉毫內照心
花外交盞而用之多文孔昭

石印匣銘爲生甫題

崇斯館寶吾名理黃中苞赤精金之玉之垂日星

杖銘

跼視地行量力汝有侍女自陪

力不任重宵我僂僂佚我以老逍遙負手

鉛鄧石如篆書弟子職後

聖功育德義正于蒙幹身維禮直內思恭筋骸以束血
氣以平習與智長是謂少成我有良書圓規方矩亦嬾
斯說垂範來許

養一齋文集卷第十九

武進李兆洛

雜著

連珠

蓋聞氣摩則交神摩則消金以摩利木以摩敝石得摩
乃芒玉得摩乃光水火摩而淪日月摩而翳是以君子
審所與摩守所受摩定其交而後求故全也不見知而
不悔故專也

蓋聞懷慧捷之辯者必有微眇之致抱殷勤之思者必

有密麗之色是以上士精進心如芭蕉仙人凝神膚若
冰雪

藍閨月盈珠滿霧起玉津淪精自浹飛潤相因是以栖
山築岩或被褐而不嚙臍牛窓斗必望氣而知珍

蓋聞金狄之身比剛不壞商容之舌示柔以存是以內
直外寬君子自適欒栢之內一陰一陽聖人正在剛柔
之間

蓋聞泉精之闕瓊華之室通璣璇而布元氣宗仙靈而
御品物是以中階七曜演道甲而開山下都五龍道沮

倉而被跡

蓋聞觸石纖纖頃刻而載撫六合歸墟浩浩終古而不
涸一川是以稟授無形神托秋毫之末周環有謝思懸
轉轂之間

蓋聞道無垠垓不元不白行有壇宇可水可懸是以美
哉璠璵一則字勝允矣君子望之儼然

蓋聞依神相扶得一而保擲技挺柄于世族摸蕪牽連
于微渺是以知己之不係于物者非有爲于物也而物
有爲于已知道之不離夫器者惟自適於器也而器自

適于道

蓋聞微風過簫響不必厲中衢設尊旨豈在多是
以托不得已者遺心而合氣于漠接而生時者不言而飲人
以和

蓋聞大鵬之運特負垂天神龍將興是資一勺是以鉅
鉅而細細隨其所憑物物而化化羌無可度

蓋聞物有同出于一所爲各異亦有本不相類合而成
效何者形異則左右別施聲和則金石並調是以萬端
襍糅相忘乎道術天倪所和祇因平衆妙

蓋聞由基中微豈乞靈于利鏃夷光飾妍非假寵于明
鏡然的不能以徒手破影不能爲陋姿靚是以珠璣在
握奚煩海客之求玳瑁裴書乃擅才人之勝

蓋聞畏傷而避伐則抱質者無術矣懲涅而守黑則懷
清者先隳矣是以自本自根先天地而不爲老獨出獨
入濯緇垢而未嘗知

蓋聞平者道之總虛者道之孔是以休乎泱泱履大方
而鏡太清得之參寥子副墨而孫雒誦

蓋聞陰陽爲炭鑄羣生于造化之中山泉可平挫萬物

於秋毫之末是以據實而運有氣卽融養空而游於神
不闕

書汪孝子事

孝子名一崧字伯高姓汪氏江都人吾友孟慈部郎之
從祖父良溥工詩著味山堂詩集孝子年十六母潘病
篤孝子禱於神割臂肉和藥以進病良愈越三年而孝
子卒其父爲作詩以哀之事在康熙二十七年孝子未
娶無子嗣久而遂失其塋所或云在平山堂側五烈祠
之右孟慈至其地於荒隴之隙匍匐四拜禱曰塋在是

耶明靈詔之歸而假寐見一丈夫作叱咤狀曰奈何以是爲墓所遂驚寤嗟乎忠孝之行發乎至性之所不能已當其時且不有其身何有乎人世之名與身後之骨乎惟此精爽蟠際支拄兩間不可漸泯耳孟慈之必欲求其墓所孝子之不以墓所相示皆動於至誠所謂庸行也孟慈記其事示予感而書之

記陳烈婦事

江陰烈婦陳何氏農家女名冰姑父御良母沈氏幼而失恃育於姨之適吳者九歲字陳世榮爲童養媳舅汝

發姑祁氏世榮劉氏子也汝發無子而子之冰姑質性
端淑事舅姑孝謹操作終日未嘗辭勞翁病刲股肉以
進翁歿勤紡織以養姑鄰里皆敬之年二十一將成婚
而世榮病歿冰姑爲之營塋如禮塋畢投繯殉焉時雍
正六年八月十七日距世榮之歿纔七日邑令張公經
聞而嘉之親往奠邑訓導朱公曾爲之撰傳且請旌尼
於大府不果何之族有適譚適陳者皆以未婚守節爲
鄉里所稱乃並建雙貞一烈祠張君復爲之記記傳俱
勒石祠中其存可考而邑人趙瞰江曦明著桑梓見聞

錄言冰姑之姑沈氏初嫁劉五無子以兄子嘉爲嗣卽
世榮也五卒沈據五產贅汝發以冰姑配世榮所言殊
異其文頗參錯不相應乾隆 年世榮從孫燮復爲冰
姑請旌得

前言建坊燮復錄曦明所爲傳糾駁之爲辨誣錄詢諸
邑人士之知往事者皆以燮言爲然故爲著其事告後
來修邑志當信碑無惑于趙也邑明經高東川觀瀾爲
予言今年夏陳氏族子有鬻烈女祠屋者將毀之甫及
牆見大蛇昂首怒目視駭而止朱秀才九鑒言數年前

有浙江人來覓烈女祠而致奠者云烈女已得仙嘗降
乩於其家自言所居鄉邑故來祀之近時又有蔡涇人
亦來祠致奠所言皆同此事荒幻非所當言要之烈女
靈爽固當不泯道光十三年八月

記陳貞婦事

陳貞婦浙江秀水縣人江蘓江都縣議叙八品杜思寬
之聘妻也祖景瀛任淮揚道與父徵相繼歿兄光照爲
寶應縣縣丞依以居光照罷官不能贍復依其女兄于
儀徵女兄之夫傅大光爲儀徵稅課司也思寬字廕棠

祖甲故河間府知府父鶴齡早卒思寬事母以孝稱家
貧佐幕自給爲江西方伯先福主章奏以軍功得八品
議叙娶曹氏無出而卒妾王氏生二子二女亦卒乃聘
貞婦爲繼室未婚而思寬客死南昌戴廷璋者與思寬
同幕于先者也病視醫藥歿爲舍歛攜其幼弱扶輿歸
江都貞婦聞白女兄請歸於杜女兄尼之曰杜家無立
錫地子女又穉幼若何恃以生婦曰此吾所以必往也
遂往拜思寬之柩率子女問誰經理身後偕若等來者
以廷璋對收涕謝之告於杜之族儼居舊城而卜兆于

城西塋舅姑與思寬及其妻妾無違禮思寬之在南昌
會先方伯調任廣東思寬獨以病留廷璋既經紀其喪
還述貞婦事於先先感之厚賻贈焉得稍給朝夕佐以
十指撫子女迄成立子長曰縉娶大光女次曰縉娶光
照女細能力學又病瘵卒女長者適直隸舉人宋某其
次則廷璋以爲已女爲擇配徽州董廸洋具奩而贅之
思寬嘉慶十三年十一月卒貞婦今年五十 廷璋字
南巖婺源人僑居江陰與周生廣良善悉其事爲予述
之貞婦之厄於天也甚矣而從容矢義常變一節若行

所無事者宜其力之足以挽回造化也戴君之不負死
友先方伯之不遺故舊皆當世所難而思寬能得之其
爲人抑可知矣道光十年四月

書張孝婦事

張孝婦故倡也不知其氏年四十餘爲張履吉妻履吉
旋出外遺其母於孝婦孝婦佐姑勤織紉以爲活而事
姑盡爲婦之道履吉久不歸值年饑無可資以養孝婦
有女弟爲陳野航妾乃如陳氏爲司倉婢得值以贍姑
月必一再歸爲姑浣濯縫紉及姑病且死又周詳盡禮

哀毀骨立既而復如陳氏歲時忌日必歸祭祭必慟哭
盡哀鄰里聞之莫不垂涕也以故人稱曰孝婦孝婦云
履吉客死於外時孝婦年七十矣衰經成服慟哭幾死
而履吉族人利其遺產逐孝婦他往孝婦自是不復至
張氏死於女弟所

書顧氏事

顧氏毛球琳妻球琳力學積勞致疾卒顧氏年二十三
僅一女泣告舅姑曰我有當死者三年少嘗死無子嘗
死舅姑有他子當死舅姑正色諭止之乃以仲之子爲

嗣復夫顧氏一慟幾絕姑後委曲諭之以季之子爲嗣
顧氏勉從命撫育成立至八十歲而卒

史論一首示子常

左伯桃羊角哀同入楚道乏糧度不俱生并衣食於哀
而桃餓死尸交子叔慈子其思革子同入吳道乏糧度
不俱生并衣糧於革子而二子凍死范式謂河道張邵
曰後二年當拜尊親至期邵白母設饌以候之母曰干
里結言何期之審耶是日果至卓恕從建康之會稽辭
諸葛恪言某日當復至省觀至日恪不飲食以須皆曰

相去千里豈得如期俄忽至

養一子曰若左伯桃戶文子叔嚮子茫二卓忽可謂難矣雖然吾尤賢羊角哀革子張邵諸葛恪也其與人也摯故死之趨之者若不及其自審也則至於人爲之死而安然受之而不以爲疑向使哀不遇桃革子不遇二子則真沒而死誰惜式與忽不踐其言其于一時之義何害而使邵恪之意不彰且使不信不果得有所藉口其爲世道人心患尤非淺鮮也嗚呼若桃式諸子者曷可少哉曷可少哉

記泰始甄 二首

泰始十年甄凡七枚皆吳上舍楚園物甄之側文曰泰始十年其一端文曰陳黑其一側爲闌干文一端爲圓文三枚皆同而字體各小異一枚無陳黑字其三枚無字但一端一側作闌干圓文楚園以一枚貽予予製爲硯乃爲楚園製此研而記之楚園方春字也

鳳臺古壽春下蔡濱淮地多故城址土人掘地往往得古磚此邑上舍吳方春所貽考晉泰始十年爲吳鳳凰二年時王渾鎮壽陽陳黑蓋督將名製爲研識其背嘉

慶壬申臘月望

記唐駟

博凡數枚文率不完參而讀之曰大唐七年月日壽春舍人謝某塼此貽鄧少府青雲火色騰上稱斯賢也

記研

端石貴青花以其宜墨也此宣德巖而青花不減西洞故是珍品嘉慶己卯勤志館製

募修迎福寺疏

今所謂破寺古曰迎福寺始唐天祐間邑人陶靜捨宅

爲之開山祖曰全菴復師寫蓮花經投筆於池冬月生
蓮搗冰蓮方丈四方歸禮規模甚宏自宋元迄明其廢
而復興詳天順元年錢塘楊寧修造碑碑今在寺旁民
家壁間下積糞穢近始募人滌而拓之昔也何其莊嚴
今也如斯破敗甚非繼長增高都邑完安氣象也夫創
立寺觀招來僧徒非

國家所以爲政而使民回心向善惕然不敢爲惡其於
祇廸義教亦庶有裨焉寺僧化禪與法侶 立志修

整徧求檀越隨緣樂施建百子堂於前以次繕完大殿

繼葺廊房願甚大而不敢遽爲大言費甚鉅而不敢遽
求鉅施惟是累月累年守茲弗替以期得尺得寸循序
有成爰及吾門請爲募疏念舉廢起墜有基勿壞晉古
剎之舊觀保邑中之勝境固邑賢士大夫之責而僧徒
能代之所當踴躍以襄是舉者也故爲徧告開士普賜
解推修橋補路同此發心斗粟寸絲亦名喜捨無論善
以成慶福田卽是心田抑且有而弗居釋者歸於儒者
矣

養一齋文集卷第十九

養一齋文集卷第二十

武進李兆洛

雜著

小學問

聖賢之學所重躬行文詞技藝末焉而已自鄉舉里選之法廢不能不資於文詞文勝則實亡固其宜也思爲躬行之學者莫要於朱子之小學此古者灑掃應對之事也而學者忽爲淺近莫肯致力亦弗思焉耳夫灑掃誠小事而循而習之可以固筋骨便周旋嫻動止應對

誠小節而循而習之可以別尊卑調聲氣利喉舌卽此
兩端推之而其餘之有益於人者可知也習之則必教
之教之則必深知其意爲之剖析其義類引而申之卽
小以見大由淺以入深故養蒙爲聖功始也諸生斐亶
能文自謂明於義理矣請卽灑掃應對以爲問灑掃之
則備於弟子職曲折如繪矣其曰執箕膺搢厥中有帚
搢作何解下文云以葉適已搢或葉之訛乎其曰坐板
排之坐對下文興字坐卽無從用帚故別以板排之耳
板何物乎應對之則詳於曲禮描狀盡情矣其曰負劒

辟耳詔之疏謂倚兒背如負挾諸脇如劍意甚精而不
知斂字之義他有類此者否其曰疑事無質直而弗有
注謂彼已俱疑而已成言之則傷知已若不疑則稱師
友而正之謙也經意果如此否卽此二端疑已三四則
致力小學正有功矣宋呂氏小兒語明程氏讀書分年
日程袁氏功過格黃氏人譜皆小學之要書而躬行之
實事然或以小兒語爲淺分年日程爲拘功過格爲誕
人譜爲廓能知其辨否士先器識此器識之大者也其
發憤一陳之

農桑問

論語樊遲請學稼子曰焉用稼說者以爲樊遲將農隱而夫子止之耳夫稼非農也農安用學周禮大司徒掌土會之法辨五物九等辨十有二壤之名物以教稼穡遂大夫簡稼政修稼器司稼掌辨種稂之種周知其名與其所宜地稻人掌稼下地草人掌土化之法以物地相其宜而爲之種蓋稼猶穡也后稷之穡有相之道則學稼者爲后稷之學云耳夫子不之答而古來土會土宜土化稼政之大凡皆不聞於後世也古所傳伊尹區

種之法今行之多不驗夏王溝洫之制則宇內咸宜溝
洫備詳於周而遂人匠人其制差別蓋皆主其概而言
之以爲凡例非規方畫一銖積寸累之也九數有方田
之法別爲一事可見隨多就少各因其宜補短截長舉
符其數而已而鄭氏遂以十夫有溝九夫爲井截然分
爲貢助之異願爲之分別其是非至收穫早晚一熟再
熟卽所謂種耒之種必辨其所宜地非能統彼此而同
之者而地之可再種與止可一種尤不能不別宋史載
大中祥符四年江浙小旱使載占城稻分給之并內出

種法當時亦不聞爲民利願爲之分疏其所以然江南地無遺利矣而墾墾之地亦時有棄而不植者竊以爲得古土化之法當無不植如江浙糞田或用豆屑或用零星皮革或用石堊之類皆可推類究之以合於用豈用鹿之義願爲之略尋其比例諸生多負耒橫經之士其推格致之餘功以充用稼之實學焉

聲韻問

詩之爲經有韻之文也而周易尙書亦多有之下至周秦漢初諸子其文亦往往用韻如司馬相如揚雄之以

賦名者無論然十三經無韻字卽說文亦無韻字治古文者以六均之均字當之深得其理矣能爲證明之否北魏李登始作聲類分宮商角祉羽爲五篇呂靜循其遺說作韻集而始有韻之名梁周彥倫始別平上去入爲四聲著四聲切韻而沈約因之韻之有專書自此始然梁武帝尙不辨四聲則知自此以前但用五音耳聲類之爲書體例當亦同今之韻書故呂靜因之爲韻集也登書已亡義類尙有可循者否人聲隨乎風土故南北不同東西殊別往往難於諧和或譏沈約爲盡用吳

音得其實否五音旣可以爲韻則亦可不必四聲矣自明陳第發古音之端而

本朝諸儒繼述之可謂日精而月密矣而每於入聲分部多有齟齬明周德清作中原音韻有平上去而無入至今度曲者皆用之旣可用于曲卽可用于詩陳第諸公何不竟并入聲于平上去三聲以還五音之舊之爲古音也其理有可引申否夫知音而不知聲者衆庶是也諸生含宮吐角尙爲分別言之

律呂問

樂者原於氣而聲以効之氣無形聲無體惟恃神響之
聽所謂既竭耳力者也而耳之于聽亦無形無體不得
不假於數以章之使後人有所依以求其本此度量權
衡之法所謂本于黃鐘也究之依於數者有跡原於氣
者無跡果可以得其密合之道歟杜夔萬寶常庶幾古
倫曠而不可多得言樂者率研求於度量權衡以幾其
或得之唐修晉書列十五種凡二十餘品宋又有王
朴緯琦丁度鄧保信胡瑗阮逸魏漢津等明又有李文
利韓邦奇等而鄭世子埴最詳於纍黍縱橫並以周秦

漢泉乃參較其度要皆訟無證之廷執獨是之見徒令聽者惶惑凡此紛紜孰爲近之歟綜稽古人所論惟蔡邕銅龠差合於古胡瑗九分方之說差得圍徑之實而持論者莫之與能爲之合較古今度量權衡之說而申之于古律未必無補也亦有意於是歟宋蔡季通據小司馬注史記九分寸之說著律呂新書至今傳之宋史又稱江陵府學教授彭應龍注漢書律秣志設問答著鐘律辨疑至精密多發前人所未言而卒不傳其遺說尙有一二存者歟諸生有志知樂則聞絃賞音將傾耳

焉

圖繪問

輿圖之學

本朝遠邁前古測星度以定地里南北東西之方位不爽毫髮可以坐一室知宇宙真承學士之幸哉周官保章氏以星土辨九州之地所封封域皆有分星以觀妖祥則左氏所列星紀壽星等十二宮分野是也在天之宿度本分攝乎大地之山河而不聞以列度紀疆理故宋鄧南服而屬子丑秦晉西北而屬未申理致膠轕後

人遂有互易其宮以求合者能詳言之歟明劉基清類
天文分野書不盡承古法于近時地形約可通而亦多
參錯不相中能畧指之歟今旣以地里準天度以天度
定東西則亦可畧舉一省以爲根以度數約差之以訖
於周天不言機祥不區宮分但定方位使地之氣常屬
于天雖有動靜之分而無乖離之患此亦清類天文分
野之遺意而有志圖學者所當究心也意亦可稽求研
窮爲之創法者歟古之繪圖大率約略方向而已晉裴
秀始明準望之理其說云何宋謝莊爲方丈圖可分可

合其制云何元朱思本創爲分方格之圖其說云何其
各舉所習以爲叩槃捫籥者發其部

法象問

璇璣玉衡法象之原其法不傳而說者以爲卽後世之
渾天儀蓋爲近之漢初言天者四家而李淳風言古論
天體者凡八家能列數之否史記天官書本之甘石所
載列星分爲五宮而無三垣二十八舍之目隋李播大
象賦唐瞿曇悉達開元占經則曰中官外官又區東西
南北四宿唐修晉隋之志皆同之而有二十八舍矣惟

鄭樵通志載丹元子步天歌始有三垣之名嘗意丹元子卽唐末之王希明乃北周庾季才靈臺秘苑則三垣首列并載步天歌則丹元子其南北朝時人耶何以唐初諸人皆莫之知也抑庾季才之書傳之者本少而爲後之妄人所附益耶能別白言之否星有古有而今無如北魏張淵觀象賦有竹林鴻沼虎豹熊羆等星而諸家無之步天歌有天稷天廟器府諸星而

欽定儀象考成實測則皆無之是也有古多而今少者儀象考成實測傳舍六星今止五耶位十五今止十羽

林四十五今止廿六列宿凡少八十三星是也有古無而今增者

欽定儀象考成實測北極增四勾陳十八穀三十四臣二十九周天凡增一千六百十四星是也夫古有今無者昔人有精盡而暗或有隕墜之說似矣古無而今增者殆陽光散布隨時結撰者歟能測知其理否近南極二十餘度天星恒隱不見自西人入中國而得其圖

欽定儀象考成依之而渾天之法象始全然雖經實測而中國究未嘗見君子道其常則蓋天之法意固不可

廢歟西法改十二宮之名而列宿之名亦皆不同中國別以形象區分之其圖未之見也有能測知某象爲某宿者否律禁私習天文惡其妄言禍福耳伏辰絡角婦孺皆知諸生其以得於管窺者言之

方州問

黃帝設方州分而爲九禹貢因之舜始爲十二州稍覺所分者寬狹不均有必分之故否夏殷復爲九州則似舜之所分非其實也殷周九州與夏稍異分別言之秦爲三十六郡後又益以四爲四十郡考之頗有參錯能

按理之否漢亦爲九州故揚雄有九州箴漢書地理志
不著何以故漢地理志郡國一百零三今實核其數乃
不相符能分析其故歟後漢十三州晉州十九能悉數
之歟南宋以後析州益小地不半天下而爲州二十二
兩齊二十三北魏州一百十一有僑郡有羈縻紛總不
可憑也能約畧言之歟隋始復爲九州大約從古唐以
州爲郡縣之名而分天下爲十道其悉數之宋始分路
其初爲二十二路後爲二十六路其悉數之元置中書
省外爲行中書省內外共十二省明裁中書而省之名

乃仍于元凡十五省其悉數之儒者不闕戶知天下古
今沿革不可究詰地形要隘利害皆非所宜言其大概
則當藏之胸中矣

訓詁問

爾雅一書所以釋諸經也釋詁釋訓分別名篇其義何
辨漢志列之孝經後而張揖陸德明輩以爲著自周公
何以言之揚雄以爲游夏之徒近之矣而亦有後儒所
附益者何以別之胥濂兼簪擊銓之類不見于經何以
出之劉幾瞿銳心肝肺腎實沉鶉尾具見于經何以遺

取諸革也。至今日而推步之學極其精矣。試爲舉其凡而略問之。詩十月之交說者以爲日月交會交行有退分月行有進。分其術起于何時。日月遲疾至郭守敬平立定三差而益密其名義若何。四分術推昏明中星始用少太強弱之率。後來推步者頗廣諸他用其率若何。三統本於太初以律起歷。參以易象其說頗爲周密。按之算術實不盡。然能言其故歟。宋秦九韶大衍求一術用之推步頗爲便捷。前此已有其法否。諸生有通其學者其畢言之。

算數問

物生而有象象而有滋滋而有數易曰參天兩地而倚
數數之爲用大矣哉九數特其小小者耳六藝殿以九
數鄭司農云九數方田粟米差分少廣商功均輸方程
盈不足旁要今有重差夕桀句股也今九章有勾股而
無旁要劉徽有重差一卷其旁要夕桀曾見於他書否
夕桀或以互桀之譌果然否開方法九章止於立方三
乘方以下始見何書古法與泰西法孰爲簡便開方借
一算所以張方廉之本後人謂之立天元術泰西謂之

借根方宋元及明精其術者幾人其書見存者幾種朱
世傑四元玉鑑復於天元外益以三元其乘除相消之
法可略言否要之用數必有裨實用如九章是也借根
方及四元之法可藉以知用數之無窮而因以闢數術
之巧拙非日用之所施必如宋之邵康節明之黃忠端
庶幾通於數之原能參天而兩地者耳諸生書數之學
弁髦已知所志者其悉陳之

小學解

古經存大學而小學缺如其留遺于今者管子書中之

弟子職最古餘則戴記中之曲禮內則少儀皆是循而習之其亦可矣蓋古人之教以身先之幼者從而習灌灌語言已有不必況傳諸文字乎既入大學則當明其義理詳其節次不得不書之以爲教也古并無所謂小學卽士大夫門側之堂謂塾無學名幼則從父兄習禮於此孝弟謹信是也餘力學文則六書九數是也豈如後世有書可讀哉朱子集古遺書及古人言行爲小學以資論說則有餘以資肄習則不足其文又皆淺近習見故成學者多厭薄而不觀朱子本以開幼小而非以

示成學耳此其所以抱發蒙善世之深心而卒不克觀
化民成俗之成效者也若夫古書流傳每有訛誤如弟
子職之左酒右漿漿訛醬左手執燭右手正櫛之左右
互易挾七之挾當作挾捧擊之擊當作擊并器之并當
作屏錯總之總當作總厥櫛之櫛當作聖皆是也膺搢
之搢當作搢以葉適已之葉亦當作搢則可以少儀正
之說文板判也古人每謂方爲板蓋帶有漏而板則無
故以板排之隨所宜耳非有主名曲禮負劒之注自精
然劒字自來無如此形容者歐陽公灌岡阡表乳者抱

汝而立於旁或云抱本作劍則曲附耳抱與劍絕不同也疑事無質直而勿有止少儀無身質言語耳此等之疑多從義理推闡非實事必欲爲小學當卽實事指點今之依傍以求諸踐履間小兒語淺而可味讀書日程塾師定課功過格提醒此心人譜倫常模範皆本朱子小學各就一節演之皆深有益於小學而皆病於論說多而實事少皆無與於養蒙之實功也要之自唐以後以文取士欲進身者非此莫由而教者學者皆以是爲務宋儒注五經四子書爲之先導法非不善而童蒙豈

能講解徒爲他時勦說塗澤之用而世之延師者皆輕
童蒙師但求稍識句讀不問品詣以此爲教何望弟子
之有成哉誠欲曠然一變其俗惟在

聖天子敦崇古訓首端士習而已

農桑解

周官稼政大要在以年之上下出歛法次則辨土會之
五物九等十二壤之名物而已土會之法當卽管子地
員篇所爲五粟五沃五隱五壯之屬或尙是成周之遺
而呂氏春秋任地辨土審時諸篇亦其遺教皆瑣屑不

堪宜夫子不之答也區種之法具於齊民要術近有仿之以課農者雖占地少而人工甚煩或不足以償勞費溝洫之制古今通行匠人遂人皆是約舉其數各備一端鄭氏以十夫九夫強分貢助且分別緣邊若干里治溝治澮甚失本旨一熟兩熟率因地力尤關天時兩熟之處大抵早暖而晚寒耳而兩熟之所得與一熟者畧相等計其費亦略相當則地力本不能相懸也豈能強之使同蓋農民雖愚而盡思慮以從事田畝則其利病必能周知因民之常則天時地利自得其宜矣或豐或

歛歸之於天不必因偶爾凶饑別思新奇之法也土化之法則古聖相傳如素問之洞見府藏本草之深別情性決非後世所能懸揣而得求其比例如用石堊者或以水冷而暖之或以水濁而定之用豆屑者以土燥而膏之用皮革者以土薄而厚之此皆老農所知卽土化遺意也用鹿用貍用犬用羊惜無有以各獸之性如本艸之各爲分別者而所爲糞種昔人謂以此漬種甚有理若以爲糞土則麋鹿貍之類其骨不可多得也至燒垆或不植多是人力不能兼管但加糞土無不植者此

又不在土化之例也

聲韻解

古有同文之教無同音之教蓋音統於樂文統於書不相涉也徒以音論則自古之音以時異一時之音以地異一地之音以人異一人之音以年異不可得而齊雖自古有吹律定聲之法而著之以字則一字之音輕重緩急可該數律又烏得而齊之故人自爲說家自爲學任其口吻狃其耳力異喙而爭鳴者莫有如韻書之勞然者也以均字代韻字以爲復古始於顧氏其議甚合

江氏又博證之如國語之立均出度度律均鍾後鄭注
大司樂之以中聲定律以律立鍾之均蓋皆韻字古今
之異文韻書始李登聲類繼以呂靜韻集皆以五音分
部而無四聲之分周彥倫四聲切韻始有專書而沈約
因之李登呂靜之書已亡近時陳氏鱣爲之拾集採錄
而聲類僅存字義韻集以韻氏家訓所別清仍耕登辨
其類例而不能確知其五音部分何如則亦無可據依
黃公紹謂韻書始自江左本是吳音今沈韻已亡而陸
法言之切韻一本於約而一時與法言同定者法言家

臨潼盧思道家范陽辛德源家狄道薛道衡家河東顏之推家臨沂劉臻家沛皆北方之學者公紹未之考也古無四聲而有五音今有四聲而上下平歧爲二則亦五聲然字母之學以宮商角祉羽定唇齒牙舌喉而五者各有四聲矣吳棫韻補有古音之說朱子以之注經本朝諸家研究益精第可存其一說而無施于實用如尊夔陳鼎聊存古式云耳周德清中原音韻僅可施之曲調不能用之詩篇蓋樂與書無從相通也協陰陽之氣而寫之以音本乎天也制作文字定之以形別之以

聲此由乎人者也古聖造書未嘗配以律李登以五音
命字矣而未嘗析平仄神珙等韻亦借音辨字而未嘗
以字定音夢溪筆談謂樂家隨律命字濁者爲宮稍清
爲商最清爲角清濁不常爲祉羽韻家則以唇齒牙舌
喉定之又有半宮半祉無從相合也況自唐以律詩取
士最重平仄而究豫雍冀間尙有平仄不能別者若去
四聲而歸五音則益無準矣學古之士以其餘力稽求
古音則亦可矣施之於用毋乃慎乎

律呂解

司馬氏律書曰神生於無形成於有形然後數形而成
聲從有以至未有以得細若氣微若聲聖人因神而存
之雖眇必效情非有聖心以乘聰明烏能存天地之神
而成形之情哉神者物受之而莫能知及其去來故聖
人畏而欲存之惟欲存之神之亦存其於言律可謂精
矣閔代必有樂皆所謂畏而欲存之者也而能存天地
之神以成形之情則難乎其言之矣後世儒者之言樂
知數形而成聲也而其所謂數者皆物耳氣與神則不
之及矣姑就諸家所通會者言之不知實管之宜異忝

則容受必不符不知考律之用方龠則黃鐘必非八百
十分不知徑三分之積六百四十分則必以方徑爲圓
徑不知周輔止用十寸尺則聲不能中黃鐘之宮不知
玉律積數增多則隋志錯誤之故不明不知燕樂雅樂
異調則郊廟與房中無別不知中管之非元聲則八音
俱乖本律不知校律用尺再乘方則得數必舛不知今
權所應之律則不能審古物應律與否此其考校度量
權衡之大較也至容黍之實則蔡邕銅龠差爲近之論
周徑之冪胡瑗九方分之說可破前人之惑皆其一端

耳欲合校古今而申之則萬言未罄矣彭應龍所著鐘律辨疑今已無有存者遺說亦他無所見其與蔡季通異者蔡據小司馬彭據漢書以黃鍾長尺長九寸之分耳無以大異也所謂雖眇必効情者俱不存乎此也所謂神受之而莫能知及其去來者也

圖繪解

分野之說最古必古聖人自以所見於天人者定之不可得而意揣也見於左氏者如辰爲商星參爲晉星龍爲宋鄭之星皆有其故後世無從而知之戰國方術家

按十二宮以星占分列國吉凶有驗有不驗以此而已
徐圃臣以斗差之法分天正地正人正三圖以地正爲
分野所自始謂後世方域迷謬遂改易其分野并歷考
其地之災祥以實之其說巧矣然以是爲實則參差之
數未必盡然至劉基清類天文分野書畧依地域所界
差以列宿亦未嘗有驗之者也今

內府輿地圖以地里準天度以京師爲中各直省隨所
在區爲偏東偏西又以北極出地差其南北所當度蓋
自古所未有矣若必以此差排分野但以析木爲京師

以直省東西遠近定爲姬訾降婁各次以度約之以次列之盡周天之度而止亦無所難者然亦清類天文分野之續也何益實用哉倘或泥之必有以妖言兆釁者尤不可不慮也晉書裴秀傳作禹貢地域十八篇製圖之體有六一曰分率辨廣輪之度二曰準望正彼此之體三曰道里定所由之數四曰高下五曰回邪六曰迂直因地勢而制宜校夷險之異準望之法旣正則曲直遠近無所隱其形秀此法亦第九數句股法耳然自唐以下無有知之者宋書謝莊傳莊依左氏經傳製木方

丈圖山川土地各有分理離之則州別郡殊合之則宇
內爲一則此時分省分郡圖之法也元朱思本留心地
學遼人輒問病輿地圖多華離不合爲格方之式每方
百里皆以口問得之其法頗合準望之意而得之於問
不可盡準故與地上實數不能盡合也

養一齋文集卷第二十

跋

道光十一年辛卯二月

志述

以通家子謁先生於暨陽

書院先生矜其家貧無師命偕諸孫受業於宋冕之師而先生爲及門講說經義往往招

志述

與聞及冕之師

館他姓遂受業於先生有所刊刻與校讎焉先生教撫

志述

如已子姓非祭掃不令歸歸不半月輒召之再四

志述

亦感恩誼不欲去也庚子春先生纂郡志往來龍

城書院

志述

始歸歸逾年而函問至矣悲夫先生日手

一編不釋昏則集弟子論說今古剖析疑難鐘鳴而後

卽安晨鐘未動卽寤寤卽構思屬文辨色而起援筆書之十餘年如一日也所爲文不自收拾弟子各藏弄以去迨晚年諸門人始哀錄之而散佚多矣稿本模糊幾不可別識傭書者未必皆賢而訛舛多矣高文式之以爲一人集之不若百人集之之廣也一人校之不若百人校之之精也于是匆工排字刷印百部以貽先生之故舊門人

志述

亦與校讀焉昔時侍先生校前人之集

先生正其謬誤以成佳本今以活字印先生之集倉卒竣功不能考覈訛脫以貽先生羞言念及此不覺涕淚

橫集也惟是先生購求古籍精校而鋟之世必有搜尋
先生之集而鋟之者天道報施往往然矣謹企踵俟之
爾集字之役始前月二十日竟本月十六日凡二旬有
六日也道光二十三年閏七月受業弟子同邑黃志述
謹跋